



## **Omba Msaada kwa Yesu, Sio kwa Wanadamu Wenye Dhambi**

**T**azama, mimi nipo pamoja nanyi siku zote, hata ukamilifu wa dahari.—  
**Mathaya 28:20.**

Yesu aliuchukua ubinadamu juu Yake Mwenyewe. Aliweka kando vazi Lake la kifalme na taji ya kifalme, na kushuka chini kutoka kwenye mamlaka ya juu katika nyua za mbinguni. Akiufunika Uungu Wake kwa ubinadamu, Kristo alikumbatia jamii ya wanadamu kwa mkono Wake mrefu wa ubinadamu. Anasimama katika uongozi wa wanadamu, sio kama mwenye dhambi bali kama Mwokozi. Ni kwa sababu hakuna doa wala waa la dhambi katika nafsi Yake ya Uungu ili kwamba aweza kusimama pale kama mdhamana wa wenye dhambi. Kwa sababu Yeye hana dhambi anaweza kuondoa dhambi zetu na kutuweka kwenye mahali pafaapo pamoja na Mungu, ikiwa tutamwamini Yeye kama Mmoja ambaye atakuwa utakaso na haki yetu....

Ameahidi kwamba ikiwa utaomba hekima kutoka Kwake, atakupatia. Lakini si muhimu mara zote kwetu sisi kujua sababu zote. Tunamkosea Mungu heshima pale tunapohangaika kupata mtu ambaye tunadhani anaelewa shida zetu ili atusaidie. Je! Hakutupatia Mwanawe wa pekee? Je! Kristo hayuko karibu nasi, na je, hatatupa msaada tunaouhitaji? "Tazama, Mimi niko pamoja nanyi siku zote," Anasema, "hata ukamilifu wa Dahari." Neno Lake linairudia ahadi tena na tena....

Haishangazi kwangu kwamba wakati huu kuna udhaifu mwingi mahali ambapo palipaswa kuwa na nguvu. Sababu ya hili ni kwamba badala ya kunywa maji safi ya Lebanoni, tunatafuta kukidhi kiu zetu kutoka kwenye mabirika ya duniani, ambayo hayana maji ya uzima. Tunawaamini wanadamu na tunaangushwa na kupotoshwa mara kwa mara....

Tumemkosea heshima sana Bwana wetu katika kugeukia mbali na Kristo ili kutafuta hekima kutoka kwa wanadamu wenye ukomo. Je, tuendeleo kuthamini dhambi ya kutokuamini, ambayo inatuzonga kwa urahisi, au tutupilie mbali uzito huu wa kutoamini, na kwenda kwenye Chanzo cha nguvu tukiamini kwamba tutapata huruma kutoka kwa Yule anayejua mwonekano wetu, ambaye anatupenda sana hata akautoa uhai Wake kwa ajili yetu, ambaye alichukua katika mwili Wake mapigo yaliyoshushwa kwa sababu ya uasi wetu wa sheria ya Mungu? Alifanya haya yote ili tuweze kuwa wafungwa wenye matumaini.

Hatumbeshimu Yesu. Wala hatutambui kuwepo Kwake. Hatutambui kwamba anapaswa kuwa mgeni wetu wa heshima, kwamba tunazingirwa na mkono Wake mrefu wa kibinadamu, wakati kwa mkono Wake wa kiroho anashikilia kiti cha enzi cha Mungu. Tunasahau kwamba lango la mbinguni linafurika kwa utukufu unaotoka kwenye kiti cha enzi cha Mungu, ili nuru ishuke moja kwa moja juu ya wale wanaotafuta msaada ambao Yesu pekee anaweza kuutoa. Alimwambia mwanamke wa Samaria, "Kama ungaliijua karama ya Mungu, naye ni nani akuambiaye, Nipe maji ninywe, ungalimwomba yeye, naye angalikupa maji yaliyo hai" (Yohana 4:10) (Manuscript 144, 1901).